

## Inatsisissatut siunnersuummut nassuiaatit

### **Nalinginnaasumik nassuiaatit**

#### 1. Inatsisissatut siunnersuummut tunuliaqutaasoq:

Inatsisissamat siunnersuutip matuma nassataraa pappiaqqanik nalilinnik naqissusiinermi akitsuut pillugu Inatsisartut inatsisaanni § 9-mik malinnaatitsineq. Malinnaatitsinermi aalajangersakkap 1998-imi aaqqinneqarnerata kingornatigut inatsisit taaguutaasa allanngornerinut naleqqussaavigineqarluni.

Inatsisiliortarnermilu ineriartorneq aamma pappiaqqanik Nunat Avannarliit Kitaani Avannaani ineriartornermut aningaasaateqarfiup pilersinneqarneranik 19. august 1986-imi isumaqatigiissut naapertorlugu pilersitaasunik allaffissornikkut akitsuuteqartitsinnngittarneq inatsisitigut aalajangersaavigineratigut illuatungiliivigineqarluni.

1987-imiit § 9 arfinileriarluni allanngortinneqartarsimammat matumanilu siunnersuutip allannguutissat tallimat allat nassatarissammagit Naalakkersuisut paatsuungananninnerussammat eqqornerpaatissimavaat § 9-mut siunnersuummik ataatsimoortumik saqqummiussinissaq.

Pappiaqqanik nalilinnik naqissusiinermi akitsuut pillugu inatsimmi § 11 malillugu aktiat anpartilluunniit tunngavigalugit ingerlatseqatigiiffiit kattunneranni uppernarsaatit naqissusiinermi akitsuuserneqassanngillat, kattunneq Akileraasusiinernik Aalajangiisartunit naqissusigaasussaannngitsutut akuerineqarsimappat. Aalajangersagaq aamma ingerlatseqatigiiffiit taamaattut aggorneqarneranni atuutissanersoq apeqqutaasarsimavoq. Aalajangersakkami apeqqutip tamatuma nalunaarneqarnissaa siunertaralugu erseqqissaaneqassasoq siunnersuutigineqarpoq. Kiisalu aamma kattunneq aggorneqarnerluunniit akileraaruteqaassannginneranut taamaasillunilu naqissusiinermut akitsuutitaqannginnissaanut akuersissuteqarnissamut oqartussaassuseq Akileraarusiinernik Aalajangiisartuniit akileraaruserivimmumt nuunneqarpoq suliassat agguataarneqarnerata, akileraaruserinermik ingerlatsineq pillugu inatsisip atuutitinneqarnerani, allanngortinneqarneranut ilaatillugu.

#### 2. Inatsisissatut siunnersuutip imarisai

Pappiaqqanik naliliinnik naqissusiinermi akitsuut pillugu inatsimmi § 9, imm. 1-ip maannakkut oqaasertaqarnermini nassataraa uppernarsaatit arlaqartut Inatsisartut peqqussutaat assigiinngitsut naapertorlugit naqissusiinermut

akitsuusigaasussaanninnerat. Akitsuusigaannginnermi pineqarput assersuutigalugu qularnaveeqqusiinermut uppersaait, Kalaallit Nunaanni inissialiornermut tapersiissuteqartarnek pillugu Inatsisartut peqqussutaat naapertorlugu, pilersinneqartut aamma nammineq pigisamut qularnaveeqqusiinermut allagartat inuussutissarsiutinut tapersiissutit pillugit Inatsisartut peqqussutaat naapertorlugu pinersinneqartut.

Naqissusiinermut akitsuut pillugu inatsimmi § 9, imm. 1-imik aaqiinerup kingulliup kingornatigut inatsisartut aalisarnermik piniarnermillu inuussutissarsiutillit inuussutissarsiuteqarnerannik siuarsaneq pillugu Inatsisartut peqqussutaat akuersissutigisimavaat, aalisarnermut piniarnermillu tunngatillugu inuussutissarsiutinut tapersiissutit pillugit Inatsisartut peqqussutaannut taartaasoq. Siunnersuutigineqarpoq allannguinerit taakkua naqissusiinermut akitsuusiisarnek pillugu inatsimmi ilanngunneqassasut.

Nunani Avannarlerni Kitaani Avannaani ineriartornermut aningaasaateqarfiup pilersinneqarneranik 19. august 1986-imi isumaqatigiisummi immikkoortoq 6 naapertorlugu taarsigassarsinermik isumaqatigiisutit, aningaasaateqarfiup illuatungiuuffigisaani, naqitsinermut akitsuuserneqartussaangillat pisortanullu allatigut akiliuteqaataassanatik. Pisussaaffik tamanna maannamut naammassineqartarsimavoq uppersaait taamaattut naqissusiinermut akitsuusiisarnek pillugu inatsimmi § 26 naapertorlugu akitsuuserneqartannginnerisigut. Inatsissiliornermi periusiumi ineriartorneq eqqarsaatigalugu siunnersuutigineqarpoq akitsuusiisarnek pillugu inatsimmi § 9, imm. 1-imi taarsigassarsinermut isumaqatigiisutit Nunat Avannarliit Kitaata Avannaani ineriartortitsinermut aningaasaateqarfik peqataatillugu naqissusiinermut akitsuuserneqartannginnissaannik erseqqissumik ilanngussineqassasoq.

Kiisalu aamma ataatsimiinnermi maanna ingerlanneqartumi inissialiornermut, illuutigisanut ataatsimoorussanut, katitiinnarissanik nammineq illulianut il.il. Ikorsiissutit pillugit Inatsisartut inatsisissaannut siunnersuut suliarineqassaaq. Siunnersuut oqaatigineqartoq inatsisartut akuersissutigissappassuk, inissialiornermut tapersiissuteqartarnek pillugu Inatsisartut peqqussutaat atorunnaassaaq. Siunnersuutigineqarpoq taamatut allannguneq naqissusiinermi akitsuut pillugu inatsimmi § 9-mi ilanngunneqariissasoq.

Kiisalu aamma siunnersuutigineqarpoq § 11 malillugu uppersaaitinut aktiat anpartillu tunngavigalugit ingerlatsineqatigiiffiit katuunnerat pissutigalugu pilersinneqartunik naqissusiinermut akitsuuteqartitsinnginneq aamma aggorneqarnek pissutigalugu uppersaaitinut pilersinneqartunut atuuttusoq erseqqissarneqassasoq.

Matuma qulaani allannguutit saniatigut aalajangersakkanik atuuttuusunik aaqqissuinnikkut allannguutit taamaallaat pineqarlutik.

### 3. Aningaasat allaffissornerullu tungaasigut pisortanut sunniutissat

Siunnersuut pisortanut allaffissornerullu aningaasalluunniit tungaasigut sunniuteqartussatut ilimagineqanngilaq.

#### 4. Aningaasat allaffisornerullu tungaasigut inuussutissarsiuteqartunut sunniutissat

Siunnersuut inuussutissarsiuteqartunut allaffissornikkut aningaasalluunniit tungaasigut sunniuteqartussatut ilimagineqanngilaq.

#### 5. Avatangiisit pinngortitalu tungaasigut sunniutissat

Siunnersuut avatangiisinut pinngortitamullu sunniutissaqanngilaq.

#### 6. Allaffissornikkut innuttaasunut sunniutissat

Siunnersuut allaffissornikkut innuttaasunut sunniutissaqanngilaq.

#### 7. Naalagaafeqatigiinnermut namminersulernissamulluunniit tunngatillugu

Siunnersuut naalagaafeqatigiinnermut namminersulernissamulluunniit attuumassuteqanngilaq.

#### 8. Pisortanit soqutigisaqaqatigiiffinnillu tusarniaanerit

Siunnersuut pisortaqarfinni tamaginni, KANUKOKA-mi, Kalaallit Nunaanni Sulisitsisut Peqatigiiffianni (GA), ILIK-mi, Nunaqavissut Suliffiutillit Kattuffianni (NUSUKA), Sulinermik Inuussutissarsiuteqartut Kattuffianni (SIK) KNAPK-milu tusarniaassutigineqarpoq.

Tusarniaarnermi akissuteqaatit Akileraartarnermut Akitsuusisarnermillu Ataatsimiititaliamut ingerlatitaapput.

Tusarniaarnermi akissuteqaat Inuutissarsiutitigut Pisortaqarfimmeersoq kingunerivaa § 9, imm.1, nr. 6 aamma 7, taamaallaat allagartanut uppernarsaatinut atuutereersunut atuutissasoq. Ineqarmut Avatangiisinullu Pisortaqarfiup akissutaat siunnersuummi ilanngunnerqareerpoq.

Nutatsinni Sulisitsisut isiginiarpaa, Nunat Avannarliit Kitaani Avannaani ineriartornermut Aningaasaateqarfiannut akileraarummut peersitsiniarneq unammillernermut ajoqutaassasoq. Siusinnerusukkut taaneqareersutut allakkiami 6, imm. 3 19. august 1986-imi isumaqatigiissut Nunat Avannarliit Kitaani Avannaani ineriartornermut Aningaasaateqarfimmik pilersitsinermi naqissusiinermut akitsuuteqanngimmat. Naamminersornerullutik Oqartussat isumaqatigiissummi atsiogatigiittutut pisussaaffeqarpoq isumannaassallugu, piunasaqaatit naammassinissaannik. 2005-imi aningaasaateqarfiup nunatsinni pilersaarutitut atukkiussimavai katillugit 18,7 millioner koruunit.

Tusarniarneqartut allat oqaasaqaateqanngillat.

**Inatsisissatut siunnersuutip aalajangersagaanut ataasiakkaanut nassuiaatit**

Aalajangersagaq malillugu qularnaveeqqusiinermut uppersaaitit arlaqartut tunniussinermullu uppersaaitit naqissusiinermut akitsuusiaasusaanngillat.

Tamatumani pineqarput qularnaveeqqusiinermut uppersaaitit assigiinngitsut, ajunaaruteqartitsinnginnissamut allagartat, nammineq pigisamut qularnaveeqqusiinermut uppersaaitit, pigisanik qularnaveeqqusiinermut uppersaaitit aammalu tunniussinermut uppersaaitit Namminersornerullutik Oqartussat inuussutissarsiutinut tapersiissutaannut aammalu inissialiornermut tapersiissuteqarnermut kiisalu Nunat Avannarliit Nunani avannarlerni killerni ineriartornermut aningaasaateqarfiata tamatigoortumik unammillersinnaassuseqartumillu inuussutissarsiutinik siuarsaaniarneranut.

### *Imm. 1-imut*

Siunnersuutigineqarpoq imm. 1-imi, nr. 1 aamma 2-mi aalajangersakkat aamma qularnaveeqqusiinermut uppersaaitinut aammalu ajunaaruteqartitsinnginnissamut allagartanut inissialiornermut, illuutigisanut ataatsimoorussanut, katitiinnarissanik nammineq illulianut il.il. tapersiissuteqartarneq pillugu Inatsisartut peqqussutaanni, Inatsisartut 2007-imi ukiakkut ataatsimiinneranni UKA 2007/xx-tut suliarineqartussami, kapitali IV imaluunniit kapitali V malillugu Naalakkersuisunut tunniunneqarsimasunut atuutsinneqalernissaat.

Tamatuma saniatigut imm. 1-imi nr. 1 aamma 2-mi aalajangersakkat, inatsisiliornermi ataqatigiissaarinermit attuumassuteqartumik allannguinerit eqqaassanngikkaanni, allanngortinnagit atuutitiinnarneqarput. Aalajangersakkat nassataraat qularnaveeqqusiinermut uppersaaitit aamma ajunaaruteqartitsinnginnissamut allagartat, Kalaallit Nunaanni inissialiornermut tapersiissuteqartarneq pillugu Inatsisartut peqqussutaanni kapitali IV imallunniit V imaluunniit inissialiornermut, illuutigisanut ataatsimoorussanut, katiinnarissanik nammineq illulianut il.il. tapersiissuteqartarneq pillugu Inatsisartut peqqussutaat malillugu Naalakkersuisunut tunniunneqartunut, aammalu illumik, Kalaallit Nunaanni inissialiornermut tapersiissuteqartarneq pillugu Inatsisartut peqqussutaanni kapitali IV imallunniit V malillugu imaluunniit inissialiornermut, illuutigisanut ataatsimoorussanut, katiterinnarissanik nammineq illulianut il.il. tapersiissuteqartarneq pillugu Inatsisartut peqqussutaat malillugu Naalakkersuisunut akiitsoqaatigineqartut, naqissusiinermut akitsuuteqartitaassannginnissaat.

Imm. 1, nr. 3-mit 5-imut aalajangersakkat, inatsisiliornermi ataqatigiissaarinermit attuumassuteqartumik allannguinerit eqqaassanngikkaanni, allanngortinnagit atuutitiinnarneqarput. Naqissusiinermut akiliinnginnissami pineqarput qularnaveeqqusiinermut allagartat aamma ajunaaruteqartitsinnginnissamut allagartat, inuussutissarsiornermut tapersiissutit pillugit Inatsisartut peqqussutaat malillugu inuussutissarsiornermut tapersiissutit pillugit ataatsimiititaliamut pilersinneqartut, nammineq pigisamut qularnaveeqqusiinermut allagartanik qularnaveeqqusiinermut, nammineq pigisanut qularnaveeqqusiinermut, inuussutissarsiornermut tapersiissutit pillugit Inatsisartut peqqussutaat naapertorlugi inuussutissarsiornermut tapersiissutinut ataatsimiititaliamut pisussaaffinnut qularnaveeqqutitut taamaallaat

atorneqarsimappata, aammalu inuussutissarsiutinut tapersiissutit pillugit Inatsisartut peqqussutaat naapertorlugu illunik, umiarsuarnik pigisanilluunniit aalaakkaasuungitsunik inussutissarsiornermut tapersiissutitut ataatsimiititaliamut tunniussinermut aammalu nammineq pigisamut qularnaveeqqusiinermut allagaqartamik qularnaveeqqusiilluni attartornermut uppersaatiit.

Taamatuttaaq imm. 1, nr. 6-imi 7-milu aalajangersakkat, inatsisiliornermi ataqatigiissaarinermit attuumassuteqartumik allannguinerit eqqaassanngikkaanni, allanngortinnagit atuutitiinnarneqarput. Taamaasillutik qularnaveeqqusiinermut akiitsunullu uppersaatiit unnuisarfissanik pilersitsinermut aningaasalersuinikkut tapersiissutitut (Unnuisa) aningaasaateqarfimmut, imaluunniit takornariartitsinermik inuussutissarsiuteqarnermi aallarnisaasartunut aningaasalersuinikkut taapersiissutitut (TAT) ataatsimiititaliamut sananeqartut, naqissusiinermut akitsuuserneqassanngillat.

Siunnersuutigineqarpoq naqissusiinermut akitsuutit pillugit inatsimmi § 9, imm. 1-ip atuuffigisaanut qularnaveeqqusiinermut uppersaatiit aamma ajunaaruteqartitsinnginnissamut allagartat aalisarnermik piniarnermillu siuarsaneq pillugu Inatsisartut peqqussutaat naapertorlugu, takuuk imm. 1, nr. 8, Naalakkersuisunut tunniunneqartut ilaatinneqalissasut. Aalajangersakkami qularnaveeqqusiinermut uppersaatiit ajunaaruteqartitsinnginnissamullu allagartat Inatsisartut peqqussutaanni taaneqartumi § 24-mi pineqartut, eqqarsaatigineqarput.

Aammattaaq siunnersuutigineqarpoq naqissusiinermut akitsuut pillugu inatsimmi § 9, imm. 1-ip atuuffigisaanut nammineq pigisamik qularnaveeqqusiussinermut uppersaatiit kiisalu nammineq pigisamik qularnaveeqqusiussinermut uppersaammik qularnaveeqqusiussinermut allagartamik, aalisarnermik piniarnermillu siuarsaneq pillugu Inatsisartut peqqussutaanni imm. 1, nr. 9 naapertorlugu Naalakkersuisunut pisussaaffigisanut qularnaveeqqutitut taamaallaat atornerqarpat. Aalajangersakkami tassani nammineq pigisamik qularnaveeqqusiussinermut uppersaatiit aammalu pigisamik qularnaveeqqusiussinermut uppersaatiit Inatsisartut peqqussutaanni taaneqartumi § 24-mi pineqartut, eqqarsaatigineqarput.

Tamatuma saniatigut siunnersuutigineqarpoq qularnaveeqqusiinermut uppersaatiit aamma ajunaaruteqartitsinnginnissamut uppersaatiit, Nunani killerni avannarlerni Nunani Avannarlerni killerni ineriartornissamut aningaasaateqarfimmit atukkiussanut qularnaveeqqusiinneqartut, aammalu nammineq pigisamut qularnaveeqqusiinermut allagartamik qularnaveeqqusiinneqartut, taamaallaat Nunani Avannarlerni Nunani Avannarlerni Killerni ineriartornissamut aningaasaateqarfimmut pisussaaffinnut qularnaveeqqutaasimappata, naqissusiinermut akitsuut pillugu inatsimmi § 9, imm. 1, nr. 10 tunngavigalugu, naqissusiinermut akitsuuserneqassanngillat.

Aammalu siunnersuutigineqarpoq illunik pigisamik, nunat avannarliit Nunani Avannarlerni Killerni ineriartornissamut aningaasaateqarfiannut akiitsoqaatigineqartunik tunniussinermut uppersaatiit imm. 1, nr. 11 malillugu naqissusiinermut akitsuusigassanut ilaassanngitsut, tunniussineq Nunani Avannarlerni Kitaani Avannarlerni ineriartornissamut aningaasaateqarfiannut aningaasaateqarfiannilluunniit pippat. Akitsuuteqartitsinnginnermi tunniussinerit

anigaasaateqarfiup pisassarisaminik akiliisitsiniarneranut ilaasut pineqarput, tamatumani aamma pinngitsaaliissutaanngitsumik tamatuma pinerani, aammalu tunniussinerit pinngitsaaliinikkut tuniniaanermut atatillugu pippata.

Imm. 2-miit 4-mut

Siunnersuutigineqarpoq imm. 2-p atuuffigisaanut aamma uppersaatit imm. 1, nr. 8-mi 9-milu pineqartut ilaatinneqalissasut nutaamillu imm. 4-mik ilassusiineqassasoq Kitaani avannaani nunanut Nunat Avannarliit ineriartornermut anigaasaateqarfianut tunniunneqartunut atuuttumik. Imm.3 allanngortinneqarani ingerlaannarnissaa siunnersuutigineqarpoq.

Aalajangersakkatigut aalajangerneqarpoq imm. 1, nr. 3 aammalu 6-imiit 10-mut tunngavigalugit naqissusiinermut akitsuusigaannginnissamut tunngavissaatinneqassasoq, uppersaatit aalajangersakkani taaneqarsimanngitsunut pigisassatut qularnaveeqqutitulluunniit tunniunneqassanngitsut. Tamanna pinngitsooriataassagaluarpat naqissusiinermut akitsuuteqartitsineq atuutilissaaq. Pinngitsoorani naqissusiineqarnissaa tunniussinerit uppersaatip pilersinneqarnerani atuutilissaaq. Assersuutigalugu nammineq pigisamut qularnaveeqqusiissummik Naalakkersuisunut qularnaveeqqusiunneqarsimasumik pilersitsisoq, nammineq pigisamut qularnaveeqqusiussaq akiitsunut allanut qularnaveeqqusiinermi appasinnerusumik inissisimasunut anigaaserivimmut qularnaveeqqutigippagu, nammineq pigisanut qularnaveeqqusiussinerit allagartaq naqissuserneqassaaq akiitsunut qularnaveeqqusiinermi appasinnerusunik inissisimasutut qularnaveeqqusiinerup pilersinneqarnerani. Nammineq pigisamut qularnaveeqqusiissummum uppersaat naqissusiinermut akitsuut pillugu inatsimmi § 5 naapertorlugu, qularnaveeqqutip allassimasumik nalinga tunngavigineqassaaq, anigaaseriviup atukkiussaasa annertussusiat apeqqutaatinnagu. Anigaaserivik qularnaveeqqusiisorlu akitsuummut aakiliinissamut pisussaapput.

Nr. 2-mut

Siunnersuutigineqarpoq naqissuserneqartussaasunik tamanik pigisanik ingerlatseqatigiiffimmit ilanngunneqartumit ingerlatseqatigiiffimmut ingerlaqqittumut tunniussineq naqissusigaanissamut pisussaatinneqassanngilaq, tunniussineq kattunermut agguarneqarnermulluunniit atatillugu pippat. Tamannalu aamma atuuppoq akiitsunut imaluunniit qularnaveeqqutinut allagartat, ingerlatseqatigiiffiup ilanngunneqartup pilersissimasaanut, ingerlatseqatigiiffiup ingerlaqqittuusup pisussaaffittaani nangitsiffigisaanik, tamanna kattunermut agguarneqarnermulluunniit atatillugu pippat.

Kattunnertut paasineqassaaq . ingerlatseqatigiiffiup ingerlatseqatigiiffiilluunniit atorunnaarsitsinertaqangitsumik unitsitsinermi tamatumunngalu peqatigitillugu pigisat tamarmiusut ingerlatseqatigiiffimmut allamut pioreersumut tunniuppagit, ingerlatseqatigiiffimmi peqataasut ingerlatseqatigiiffimmi tassani allami aktianik anpartinilluunniit tunillugit; ingerlatseqatigiiffiit taakkua marluk arlaqartulluunniit atorunnaarsitsinertaqanngitsumik unitsinneqarneq pissutigalugu tamatumunngalu peqatigitinneqartumik pigisatik akiligassatilluunniit tamaasa

ingerlatseqatigiiffimmut, ingerlatseqatigiiffimmi aktianik anpartinilluunniit tamakkiisumik pigisaqartumut, tunniuppatigit.

Aqquarneqarnertut paasineqassaaq, ingerlatseqatiggiiffiup pigisami akiligassamilu ilaat tamaasaluunniit prorataregel naapertorlugu ingerlateqatigiiffimmut pioreersumut arlaqartunulluunniit nutaamut nutaanulluunniit tunniuppagit, ingerlatseqatigiiffimmi peqataasut ingerlatseqatigiiffimmi ingerlaqqittumi aktianik anpartinilluunniit tunillugit.

Assersuutigalugu ingerlatseqatigiiffiup ingerlaqqittup aningaaserivimmit tiguinnarissanik atukkani amerlippagit, qularnaveeqqummik qaffaaneq naqissusiinermut akitsuutitaqartinnagu pisinnaavoq, qaffaaneq ingerlatseqatigiiffiup ingerlaqqittup tiguinnarissanik aningaaserivimmit atugaasa kattunnermi agguarneqarnermiluunniit ullormi atugaasut amerlaassusaannut naapertuuppat.

Naqissusiinermut akitsuummik akiliinnginnissamut tunngavissaatinneqarpoq, ingerlatseqatigiiffiit kattuttut agguarneqartulluunniit kattunnissap agguarneqarnissarlunniit akileraarutaasussaannngitsutut akileraaruserivimmut qinnutigisimassagaat tassanggalu akuerineqarsimassallutik.

Akileraaruserinermi oqartussaak akileraarutaanngitsumik kattunnissaq agguarneqarnissarlunniit akuerissavaat maleruagassatut pingaarnetut ingerlaqqinnissamik isumaq tunng aviuppat, tassa imaappoq ingerlatseqatigiiffik ingerlaqqittusoq ingerlatseqatigiiffiup akiliisuusup nalikillilerinissamut periarfissanut, pissarsiarinninnermi piffissamut il.il. tunngatillugu taarsiuppat, kiisalu ingerlatseqatigiiffimmi akiliisuusumi ingerlatseqatigiiffimmi peqataasunut akiliutit, ingerlatseqatigiiffimmi ingerlaqqittuusumi aktianik akilerneqarpata, aningaasanngorlugillu nalimmassaataasinnaasut aktiat taakkua allassimasumik nalingisa annerpaamik 10 procentiannik annertussuseqarpata.

Aalajangersagaq aamma atorneqassaaq, akileraarusiinernik aalajangiisartut akileraarutitaqanngitsumik kattunneq aggugaanerluunniit akileraaruserivimmit itigartitsissut pillugu naammagittaalliuttip suliarereernerani akuersissutigippagu.

## *§ 2-mut*

Siunnersuutigineqarpoq Inatsisartut inatsisaat 1. januar 2008-mi atuutilissasoq.